



## Beste vastelaovesvrunj,

Hieël gaer haje wae uch in 't ieërste weekend van jannewarie vöör wille stelle aan os nuuj prinse. Mer 't zal gein verrassing zeen vöör degene die de berichtgaeving rónjdóm corona volge: 't is vöörloopig echt nog neet haolbaar óm activiteite te gaon organisere woeëbie vööl luuj elkaar kinne óntmoete. Helaas...

Aangezeen de huidige maotregels nog zeker tot half jannewarie zulle dore, en wae gaer dudelikheid wille versjaffe aan de miense die achter de sjerme (normaal gespraoke) al mèt allerlei organisatiewèrk bezig zeen, höbbe wae as bestuur 'n pienlik besloet motte neme. Wae zulle in de maondj jannewarie gein vastelaovesactiviteite organisere en óngerneme.

Dit besloet haet ouch gevolge vöör de prinse die wae reeds benaderdj höbbe. Wae vinje 't namelijk 'n vöörwaarde det wae ozze (jeugd)prins 'n volwaardig seizoen kinne beje. En 't moog dudelik zeen: det is vöör komendj seizoen neet mäögelik. **Wae zulle dus in 't vastelaovesseizoen 2021-2022 helaas gein prinse oetrope.**

Ouch waat betreftj 't bóntje weekend mótte wae helaas constatare det wae op dit móment neet in kinne sjatte wie de situatie in 't ieërste weekend van fibberwarie is. Ómdet d'r ein groeëte kans besteit det 't bóntje weekend neet door kin gaon en os artiëste tied nuuedig höbbe óm zich good vöör te bereide, wille wae ze gaer dudelikheid versjaffe. Mèt pien in 't hert höbbe wae daoróm beslaote **óm 't Bontje Weekend (zoeëwaal de Kinjer Bóntje Middig as de Bóntje Aovendje) vöör 2022 aaf te gelaste.**

Óm dezelfde raeje is 't besloet genaome óm **in 2022 geine optocht te gaon organisere, zoeëas gae det van os gewindj zeetj.** Groeëte groepe en wages höbbe tied nuuedig óm get sjoeëns te make en kinne dao vanwaege de aanhojendje óndudelikheid op dit móment neet mèt starte.

**Waal kintj gae dit jaor weer 'n sjoeën vastelaovesgezèt van os verwachte.** As de maotregels 't toelaote, den kome wae die rónjd 't weekend van 11 fibberwarie däär-aan-däär bie uch verkoupe. Daonaeve haope wae det anger evenemente die wae eind fibberwarie organisere op de ein of anger meneer doorgang kinne vinje. Wae zulle dao-äöver in 'n later stadium 'n definitieve beslissing neme.

Wae vinje 't hieël lestig det wae ouch dit jaor weer 'n karige vastelaovendj tegemoet dreige te gaon. Wae wille immers niks lever den 't vastelaovesveur brandjendj haoje en d'r vöör zörge det dees sjoeën traditie neet verlaore geit. Wae zulle daoróm de komendje tied nao gaon dinke äöver de mäögelikheid óm 'n alternatief programma aan te kinne beje, óm toch nog get van vastelaovendj te kinne vere in os Kwakkerteriek. Al zal det valle of staon bie de den geldendje maotregels. As wae mieër zicht höbbe op waat mäögelik is, den zulle wae det via os kanale mèt uch deile.

Allemaol fijn fieëstdaag en alvast 't beste vöör 2022 gewinstj.  
Haopelik zeen wae os mèt de vastelaovendj!

Names 't algemeen bestuur van vv De Kwakkert, mèt vruntjelicke groet,

Ruud Hermans  
vorst & secretaris